

■ LITTERATURA

Fallhöhe, il nouv roman da Sabina Altermatt

Che istorgia as zopparà be davo ün tiel chi irritescha in ün prüm mumaint e chi ans invida a tscherchar sia(s) significaziun(s), na evidaintas a prüma vista? «Fallhöhe», otezza dal crodar – significha illa fisica la via cha ün oget douvra cur ch'el cupicha; opür es illa scienza da la litteratura la definiziun per la persuna da buna famiglia chi crouda socialmaing ad ün nivel bass o, illa scienza cinematografica per chi chi «cupicha» dad ün stadi furtünà ad ün malvantüraivel. *Sabina Altermatt* giova in seis nouv roman cullas duos significaziuns. Ella situescha l'acziun illas muntognas svizras in Glaruna. E sias figüras cupichan, croudan, sco tanter oter ün hom chi's rumpa ün pè, ün oter as sfracha la rain cun quai ch'el vain stumplà sur ün grip giò. Eir socialmaing vain descrit üna tscherta decadenza, cul crodar i'l passà dad üna gruppa da creschüts. No gnin a cugnuoscher in fuorma da cumbinella las vitas da tschinch persunas chi s'inscuntran quindesch ons davo lur matura. La reuniun da classa vain organisada dad üna da las conscolaras chi organisescha per la classa dad üna jada üna gita illas Alps glarunaisas.

La situaziun dal roman es quella d'ün lö isolà, e quel para sco fat per ün teater pitschen, ün drama cun pacas persunas in fuorma intima; in quist cas giovà da trais duonnas e duos homens preschaints, cun quatter partenari(a)s da las acturas e dals actuors chi sun per uschè dir davo la culissa, ed implü dad ün giuvenil preschaint saja davo la culissa sco eir sül palc da la scena, v.d. da la reuniun da classa.

Il tschinch maturands dad üna jada

han uossa intuorn trentatschinch ons. Míschün ha fat ün pass (pitschen o grond) da carriera, ha chattà üna profesiun chi cuntainta daplü o damain. I han famiglia, sun sulets, independents, sainza illusiuns, han lioms libers: No inscuntrain a multifaras fuormas pussiblas da relaziuns. – Marina, üna da las trais duonnas, ha ün figl da quindesch ons e viva insembel cun Andrea. Andrea es l'amia – e na l'amì – da Marina. A la fin dal roman gnina a savair (o pensain dad avair incelet) chi chi'd es il bap dal figl da Marina, e no vain cun quai la risposta ad üna da las dumondas chi ans occupan i'l decuors da l'istorgia. E no vain eir (daplü) inceletta pels tschinch maturands d'üna jada chi cumbattan adüna amo per lur (listess) ideals, adonta chi han pers (üna part) da lur illusiuns. Las trais conscolaras d'üna jada chattan, per uschè dir «in extremis» – in güdand a lur conscolar disgrazchà – ad üna nouva fuorma da dialog chi tillas dà la pussibilità da pardunar las intrigas malmadüras e malsvoutas da Marina d'ürant il temp da scoula. Il duos conscolars Adrian e Frido ston, la saira da la reuniun da classa illa chamonna – ingio chi sun rivats pervi da las novas circostanzas » eir els tscherchar o cumbatter per üna fuorma da comunicar, croudan però per part inavo illa veglia muostra da concorrenza e blaga. I vuol l'accidaint dad ün dad els per sdruggiar e squassar a tuot la gruppa. L'accidaint vain provochà dal giuven chi'd es segi a sia mamma per chattar ils stizis e l'identità da seis bap. El chatta – differents baps...

Il roman nun ans tradischa plainamaing che chi d'eira propcha capità,



avant quindesch ons, e che precis chi ha chaschunà tant displaschair e malinlettas. E precis là es la forza narrativa da l'autura: Ella dà diversas clavs per leger il text, ella muossa divers levels da relaziuns pussiblas, vivüdas ed ipoteticas. Ed ella maina a sias figüras ad üna conclusiun cun üna fin averta ed ün futur imaginal: E quai cun tuot ils debels e forzas da persunas normalas in nos muond dad hoz.

Fallhöhe da Sabina Altermatt es ün roman chi's legia sco ün'istorgia criminalistica sainza mordraretchs, cun fin chi dà curaschi. – Cun fin realistica ed ün credo i'l dialog. La forza da quist cudesch es eir il möd sco cha l'autura sa rapreschantar in möd fin e cun gronda vitalità las situaziuns da lavurdi e da dumengia tanter las diversas persunas – cun lur paschiuns, lur rabgias, lur spranzas, lur pussanzas e lur plaschairs.

Mevina Puorger

**Fallhöhe 160 paginas, lià 32.–,
Limmat Verlag ISBN 978-3-85791-607-6**

«Sabina Altermatt cun Lucy»